

# Poliziaren kontrol guztiak legezkoak izatea erabaki du Frantziako Gobernuak

Bost urtez kartzelan izan ondoren indultua eman diote Loiseau inspektoreari

**F**rantziako Gobernuak ontzat hartu zuen atzo Pierre Mehaignerie Justizia ministroak aurkeztutako identifikazio kontroletarako legedi berria. Aurretikako polizi kontrolak zilegi egingo dituen legegai hau Kode Penal berrian sartuko da Parlamentuak onetsiz gero.

ALLANDE SOKARROS / BAIONA

Aurretik eta legez kanpoko gertakizun baten susmorik izan gabe egingo diren polizi kontrolak zilegi izango dira Frantzian, Gobernuak atzo onartutako legegai Legebiltzarrak eta Senatuak ontzat hartzen badute. Mehaignerie ministroak bere gobernuakideei aurkeztu zien legegai honek Frantziako Kode Penalarren 78. atala aldatuko du eta indarrean jarritz gero, Poliziak edozein herritar edonoiz kontrola lezake, «legehauste arriskuei aurre egiteko». Gaurko legediak dioenez, aldiz, «ustezko le-



Inolako susmorik gabe ere kontrolak egitea zilegi izango da Frantzian.

gehaustea» edo «jarrera susmagarria» behar da poliziak identifikazio kontrola egin dezan.

Justizia arloari lotuta izan arren, legedi berri honek Poliziari dio eskumen gehiago emanen eta honetaz poztuta azaldu da Charles Pasqua Barne ministroa. Honek identifikazio kontrolak egiteko araudiaren aldaketa aspaldik eskatua du, zeren joan zen

maiatzaren 10ean polizi agintarien biltzar batean adierazi zenez, «legea ez delarik egoerara egokitua aldatu egin behar da».

## LOISEAU AFERA AIPAGAI

Duela zenbait urte aipamen zabala izan zuen auzibide batean zenbait aldaketa izan zituen herenegun. Izan ere, armen bitartez egindako diru lapurreta batzue-

tan partaide izateaz akusatuta egon ondoren, 12 urteko espetxeratzera kondenatu zuten Dominique Loiseau polizi inspektore ohia aske geratu zen herenegun arratsaldean, François Mitterrandek indultua eman ondoren. Loiseauk bost urte eta hiru hilabetez giltzaperatua egon da.

Polizia honek, gaiztagin batek egindako lekukotasun baten arabera, lapurreta armatuetan ekin zuten polizietatik bat izatea akusatuta izan zen baina berak, hasieratik, errugabe azaldu zuen bere buru. Gainerat, epaituak izan ziren beste bost poliziek argi erran zuten Loiseauk ez zuela inolako eskuhartzerik izan.

Polizia zerbitzuen artean gertatutako tirabira batzuen biktima izan dela iritzi dion Loiseauk Giza Eskubideen aldeko Europako Epaitegirat joko du, auzibidearen okerrak salatzeko. Anartean, bost urtez baino gehiago jasan duen espetxean «oinaze eta pairamenez jositako mundua» ezagutu duela adierazi ondoren, polizia ohiak gaineratu du, «jendea kartzelarat sartzea erabat ezinezkoa izango zait orain».

## Frantziarrek Balladur nahi dute lehendakari

PARISE

Edouard Balladur lehen ministroa Jacques Chirac baino lehendakari hobea izango litzatekeela uste dute frantziarrek, 'Le Nouvel Observateur' eta 'L'Express' astekariak kaleratutako inkestetan agertzen denez.

'Le Nouvel Observateur-en' inkestaren arabera, frantziarren % 54ek uste dute Balladur dela «Errepublikako lehendakari ona izateko» hautagaiarik egokiena. Gobernuaren atzetik Delors dute frantziarrek gustukoena lehendakari izateko, % 43k bera hartzen baitute ontzat. Jacques Chiracek hirugarren postua besterik ez du lortu (% 38).

'L'Express-en' inkestak hauteskundeak orain izango balira frantziarrek zein hautagaiaren alde bozkatuko luketen erakusten du. Horren arabera, lehen itzulian Balladurrek botoen % 37,5 eskuratuko litzuke, Rocardek % 23,5 eta Giscardek % 16.

Datorren larunbatean,  
maiatzak 22, EUSKALDUNON  
GIDA KOMERTZIALA  
eskura ezazu  
EGUNKARIArekin batera.  
Profesionalak, gremioak,  
zerbitzuak,...  
euskara eta euskarazko  
publizitatearen alde apustu  
egin dutenak  
bertan aurkituko dituzu.

jo kioskora garaiz!